

UNIT JAMINAN KUALITI DALAMAN

Unit Jaminan Kualiti Dalaman (IQA) melaksanakan proses penilaian ke atas semua program akademik UiTM yang tidak memerlukan pengiktirafan badan profesional. Proses penilaian program melibatkan penilaian dokumen dan lawatan audit ke fakulti atau kampus yang berkaitan. Program yang memerlukan pengiktirafan badan profesional akan dinilai oleh badan profesional berkaitan; sebagai contoh, program kejuruteraan dinilai dan diiktiraf oleh *Engineering Accreditation Council*.

AKREDITASI PROGRAM

Akreditasi program melibatkan dua kriteria iaitu Akreditasi Penuh dan Akreditasi Sementara. Proses pelaksanaan Akreditasi Penuh melibatkan semakan dokumen dan lawatan ke lokasi penawaran program akademik manakala Akreditasi Sementara hanya melibatkan proses penilaian dokumen. Hasil dapatan penilaian ini akan dibentangkan dalam Mesyuarat Jawatankuasa Perakuan Pengiktirafan Program.

Mesyuarat Jawatankuasa Perakuan Pengiktirafan Program

Jawatankuasa Perakuan Pengiktirafan Program (JKPPP) berperanan untuk meneliti laporan penilaian program yang dibentangkan oleh Ketua Panel Penilai dan mengesyorkan tahap pengiktirafan untuk diperakukan oleh Senat dan dimajukan kepada *Malaysian Qualifications Agency (MQA)* untuk penyenaraian di *Malaysian Qualifications Register (MQR)*. Mesyuarat ini dipengerusikan oleh Penolong Naib Canselor InQKA dan dianggotai oleh Pengarah Bahagian Hal Ehwal Akademik, Ketua Panel Penilai Program, Pakar Bidang, Pengarah Unit Jaminan Kualiti Dalaman dan Ketua-ketua Akreditasi Program, Unit Jaminan Kualiti Dalaman. Untuk memastikan proses perbincangan adalah telus dan berintegriti, wakil Fakulti atau Kampus Cawangan yang terlibat turut dijemput sebagai ahli turut hadir. Sepanjang tahun 2020, sebanyak sepuluh Mesyuarat Jawatankuasa Perakuan Pengiktirafan Program (JKPPP) telah dijalankan.

Bagi tahun 2020, sebanyak 42 program termasuk pelaporan Audit Penilaian Pematuhan Matapelajaran Pengajian Umum (MPU) telah dibentangkan di Mesyuarat JKPPP sepertimana di Rajah 7.



Rajah 7: Ringkasan bilangan program yang dibentangkan dalam Mesyuarat JKPPP bagi Tahun 2020

Senarai terperinci program yang telah dibentangkan sepanjang tahun 2020 di Mesyuarat JKPPP disertakan dalam Lampiran1.


Lawatan Audit Akreditasi Program (LAAP) dan Lawatan Audit Lokasi Program (LALP)

Unit IQA telah menjalankan sebanyak 24 Lawatan Audit Akreditasi Program (LAAP) dan dua Lawatan Audit Lokasi Program (LALP) sepanjang tahun 2020. Sebanyak tiga kaedah telah digunakan bagi menjalankan LAAP dan Lawatan Audit Lokasi Program sepanjang tahun 2020. Kaedah yang terlibat adalah seperti yang ditunjukkan dalam Rajah 8.



Rajah 8: Kaedah Audit


Sepanjang tempoh Perintah Kawalan Pergerakan (PKP) dan Perintah Kawalan Pergerakan Bersyarat (PKPB), LAAP telah dijalankan dengan menggunakan kaedah secara dalam talian dan hibrid. Pelan Audit Lawatan Audit Akreditasi Program secara dalam talian telah disediakan bagi memudahkan sesi lawatan dijalankan. Pelan audit yang terperinci adalah seperti dalam Lampiran 2. Rajah 9 menunjukkan bilangan LAAP dan LALP yang telah dijalankan sepanjang tahun 2020.



Rajah 9: Bilangan LAAP dan LALP sepanjang tahun 2020

PROGRAM PESISIR

Satu seksyen baharu telah ditubuhkan di bawah Unit IQA iaitu Unit Pengendalian Program Pesisir. Unit ini adalah untuk membantu UiTM menawarkan program akademik dengan kerjasama Institusi Pengajian Tinggi dari Luar Negara. Seorang Ketua Akreditasi Program Pesisir telah dilantik selaras dengan keperluan melaksanakan proses akreditasi ini. Sehingga bulan Disember 2020, Unit IQA telah menerima lapan program yang akan ditawarkan secara Pesisir di Mauritius. Rajah 10 menunjukkan senarai program yang terlibat.



Rajah 10: Senarai Program Akademik Pesisir

Format Dokumen Penilaian dan Pelan Audit Lawatan Akreditasi Program Pesisir telah disediakan bagi memudahcara proses penilaian. Format Dokumen Penilaian dan Pelan Audit terbabit adalah seperti di Lampiran 3.

PENYENARAIAAN PROGRAM AKADEMIK

Penyenaraian program bagi akreditasi penuh di Daftar Kelayakan Malaysia (MQR) bagi program baharu perlu mendapatkan akreditasi sementara yang didaftarkan di Portal Swaakreditasi (PSA). Penyenaraian adalah sangat penting memandangkan sekiranya satu program tidak disenaraikan di MQR, graduan program berkaitan berkemungkinan tidak dapat meneruskan pengajian atau bekerja.

Penyenaraian Program Di Daftar Kelayakan Malaysia (MQR) dan Portal Swaakreditasi (PSA)

Permohonan penyenaraian program baharu yang telah dibawa ke Agensi Kelayakan Malaysia (MQA) bermula 2017 sehingga Disember 2020 adalah sebanyak 84 program (Akreditasi Penuh: 60, Akreditasi Sementara:24). Sehingga 24 Disember 2020, sebanyak 37 program telah disenaraikan di MQR dan 19 program di PSA. Ringkasan penyenaraian program di MQR dan PSA adalah seperti di Lampiran 5 dan 6.

Program Deemed Accredited

Penilaian Program *Deemed Accredited* melibatkan 161 program dan 615 lokasi. Sehingga bulan Disember 2020, Unit IQA telah menghantar permohonan penyenaraian Program *Deemed Accredited* ke Agensi Kelayakan Malaysia (MQA) untuk penyenaraian di Daftar Kelayakan Malaysia (MQR) adalah sebanyak 582 lokasi (2018:137, 2019: 431, 2020: 14). Baki 33 lokasi akan dikemukakan kepada pihak MQA pada bulan Januari dan Februari 2021.

Ringkasan penyenaraian program *Deemed Accredited* di MQR bermula tahun 2018 sehingga bulan Disember 2020 adalah seperti di Jadual 3.

Jadual 3: Ringkasan Penyenaraian Program *Deemed Accredited* di MQR bermula 2018 sehingga Disember 2020

Bil	Jumlah	Program Deemed Accredited (Program)	Program Deemed Accredited (Lokasi)
1.	Penghantaran Dokumen	161	582
2.	Tersenarai di MQR	145 (90%)	507 (87%)
3.	Baki Belum Tersenarai	16 (10%)	75 (13%)